

四庫全書

集部

欽定四庫全書

集部

漢魏六朝百三家集卷六十七

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官中書臣高中

謄錄監生臣王利賓

欽定四庫全書

漢魏六朝百三家集卷六十七

顏延之集題詞

顏延年飲酒袒歌自云狂不可及元凶肆逆子
竣贊世祖入討復為孫辭以免玩世如阮籍善
對如樂廣其得功名者壽或非無故也江左詞
采顏謝齊名延年文莫長于庭誥詩莫長于五
君嵇中散任誕魏朝獨家戒恭謹教子以禮顏

誥立言意亦類是名士在世動得顛挫俯循人
情以卑致福雖能言之不能行之即不能行之
未嘗不深知之也竣既貴重延年輒多謝避觀
其笑第宅之拙惡雲霞之傲視謝瞻離隔謝晦
達尤過之然彼雖厭見要人其享榮終也可不
謂要人力哉惟有子而不受子累可以不壽而
卒壽也狂不可及蓋在斯乎三十不昏以文出
仕歷四主陪兩王浮沈上下老不改性詆尚之

為朽木斥慧琳為刑餘顏彪之呼亦牛馬應之
其閱世久矣遠弔屈大夫近友陶徵士風流固
可想見云

目錄

賦

赭白馬賦

白鸚鵡賦

寒蟬賦

又

行殯賦

詔

追贈袁淑詔

表

謝子竣封建城侯表

自陳表

請立渾天儀表

為齊竟陵王世子臨會稽表

拜永嘉太守辭東宮表

書

釋何衡陽達性論書

重釋何衡陽書

又釋何衡陽書

與王微書

弔張茂度書

與王曇生書

序

三月三日曲水詩序

七

七繹

文

庭誥文

又

頌

碧芙蓉頌

赤槿頌

贊

蜀葵贊

箴

大筮箴

連珠

範連珠

謚議

宋武帝謚議

哀策文

宋文帝元后哀策文

誄

陶徵士誄

陽給事誄

祭文

為湘州祭虞舜文

為湘州祭屈原文

祭弟文

銘

家傳銘

狀

天馬狀

樂府

宋南郊登歌三首

夕牲歌

迎送神歌

饗神歌

從軍行

秋胡行

九章

輓歌

詩

應詔讌曲水作詩

八章

皇太子釋奠會作

九章

三月三日詔宴西池詩

為皇太子侍宴餞衡陽南平二王應詔詩

應詔觀北湖田收

車駕幸京口侍遊蒜山作

車駕幸京口三月三日侍遊曲阿後湖作

拜陵廟作

贈王太常

夏夜呈從兄散騎車長沙

直東宮答鄭尚書

和謝監靈運

北使洛

還至梁城作

始安郡還都與張湘州登巴陵城樓作

五君詠五首

阮步兵

嵇中散

劉參軍

阮始平

向常侍

為織女贈牽牛

歸鴻

除弟服

辭難潮溝

侍東耕詩

發景陽樓

漢魏六朝百三家集卷六十七目錄

欽定四庫全書

漢魏六朝百三家集卷六十七

明 張溥 輯

顏延之集

賦

赭白馬賦

驥不稱力馬以龍名豈不以國尚威容軍馱趨迅而已
實有騰光吐圖疇德瑞聖之符焉是以語崇其靈世榮

其至我高祖之造宋也五方率職四隩入貢秘寶盈於
玉府文駟列乎華廐乃有乘輿赭白特稟逸異之姿妙
簡帝心用錫聖阜服御順志馳驟合度齒厯雖衰而藝
美不忒襲養兼年恩隱周渥歲老氣殫斃於內棧少盡
其力有惻上仁乃詔陪侍奉述中旨末臣庸蔽敢同獻
賦其辭曰

維宋二十有二載盛烈光乎重葉武義粵其肅陳文教
迄已優洽泰階之平可升興王之軌可接訪國美於舊

史考方載於往牒昔帝軒陟位飛黃服皂后唐膺錄赤
文候日漢道亨而天驥呈才魏德懋而澤馬效質伊逸
倫之妙足自前代而間出竝榮光於瑞典登郊歌乎司
律所以崇衛威神扶護警蹕是用精曜叶從靈物咸秩
暨明命之初基罄九區而率順有肆險以稟朔或踰遠
而納賁聞王會之阜昌知函夏之充牣總六服以收賢
掩七戎而得駿蓋乘風之淑類實先景之洪庥故能代
駉象輿歷配鈎陳齒算延長聲價隆振信聖祖之蕃錫

留皇情而驟進徒觀其附筋樹骨垂梢植髮雙瞳夾鏡
兩權協月異體峰生殊相逸發超攄絕夫塵轍驅騫迅
於滅沒簡偉塞門獻狀絳闕旦刷幽燕畫秣荆越教敬
不易之典訓人必書之舉惟帝惟祖爰游爰豫飛輶軒
以戒道環轂騎而清路勒五營使按部聲八鸞以節步
具服金組兼飾丹艭寶鉸星纏縷章霞布進迫遮列却
屬輦輅欵聳擢以鴻驚時渡略而龍翥弭雄姿以奉引
婉柔心而待御至於露滋月肅霜戾秋登王于興言闡

肆威稜臨廣望坐百層料武藝品驍騰流藻周施和鈴
重設睨影高鳴將超中折分馳迴場角壯永埒別輩越
羣絢練夔絕捷趨夫之敏手促華鼓之繁節經玄蹄而
電散歷素支而冰裂膺門沫赭汗溝走血蹤迹迴唐畜
怒未洩乾心降而微怡都人仰而朋悅妍變之態既畢
凌遽之氣方屬跼鑣轡之牽制隘通都之圈束眷西極
而驤首望朔雲而蹠足將使紫燕駢衡綠地衛轂纖驪
接趾秀騏齊于覲王母於崑墟要帝臺於宣嶽跨中州

之轍迹窮神行之軌躅然而盤於遊畋作鏡前王肆於
人上取悔義方天子乃輟駕迴慮息徒解裝鑒武穆憲
文光振民隱修國章戒出承之敗御惕飛鳥之時衡故
祗慎乎所常忽敬備乎所未防輿有重輪之安馬無泛
駕之佚處以濯龍之奧委以紅粟之秩服養知仁從老得
卒加獎帷收仆質天情周皇恩畢

亂曰惟德動天神物儀兮於時駟駿克階街兮稟靈月
駟祖雲螭兮雄志倜儻精權奇兮既剛且淑服譏羈兮

效足中黃狗驅馳兮願終惠養蔭本枝兮竟先朝露長
委離兮

白鸚鵡賦

余具職崇賢預觀神秘有白鸚鵡焉被素履玄性溫言
達九譯絕區作玩天府同事多士咸竒思賦其辭曰

稟儀素域繼體寒門貌履玄而被潔性既養而亦溫雖
言禽之末品妙六氣而尅生往秘竒於鬼服來充美於
華京恨儀鳳之無辨惜晨鷺之徒暄思受命於黃髮獨

含辭而採言起交河之榮薄出天山之無垠既達美於
天居亦儷景於雲阿漸惠和之方渥綴風土而未訛服
璫翻於短衿仰梢雲之曾柯覲天網之一布漏微翰於
山阿

寒蟬賦

始蕭瑟以攢吟終嬋媛而孤引越客發度漳之歌代馬
懷首燕之信不假艇於范冠豈鏤體於人爵折清飈而
不淪團高木以飄落

又

餐霞之氣神馭乎九仙稟露之清氣精於八蟬

行殯賦

嗟我來之云遠覩行殯於水隅崩朽棺以掩壙仰枯顙
而枕嚮資沙礫以含實藉水章之襪儲撫躬中塗太息
蘭渚行徘徊於永路時悄愴於川侶

詔

追贈袁淑詔

夫輕道重義亟聞其教世敝國危希遇其人自非達義之士識正之深者孰能抗心衛主遺身固節者哉故太子左衛率淑文辯優洽秉尚貞懋當要逼之切意色不撓厲辭道逆氣震匈黨虐刃交至取斃不移古之懷忠隕難未云出其右者興言嗟悼無廢乎心宜在加禮永旌宋有臣焉可贈侍中大尉諡曰忠憲公

表

謝子竣封建城侯表

伏見策書降錫息竣開國建城縣侯爵踰三等戶起兼
千生邀洪禮身茂盛世闔宗革聽盡室改觀誠慚末品
誤參其泰臣聞子之能仕父教之忠忠教善信臣實負
其前誥能仕志政竣固暗於明試徒以數遇會昌消憂
啓聖幸與靈祚福德共從義勲分賞執珪登朝析金受
邑慶重慮愆恩往懼積非臣髦蔽所任圖報豈竣庸薄
所能奉服

自陳表

臣聞行百里者半於九十言其末路之難也愚心常謂
為虛方今乃知其信臣延之人薄寵厚宿塵國言而雪
效無從榮牒增廣厯盡身彫日叨官次雖容載有塗而
妨穢滋積早欲啓請餘冀屏蔽醜老但時制行及歸慕
無賒是以怵冒愆非簡息干黷耗歇難支質用有限自
去夏侵暑入此秋變頭齒眩疼根痼漸劇手足冷痺左
脾尤甚素不能食頃向減半本猶賴服比倦憊晚年疾
所催顧景引日臣班叩首卿位尸封典肅祗朝校尚慙

匪任而陵廟衆事有以疾怠宮府覲慰轉闕躬親息災
庸微過宰近邑回澤爰降實加將監乞解所職隨就藥
養伏願聖慈特垂矜許稟思明世負報冥暮仰企端闡
上戀罔極

請立渾天儀表

張衡創物蔡邕造論戎夏相襲世重其術臣昔奉使入
闕值大軍旋旆渾儀在路肆觀竒秘絕代異寶旋及王
府考諸前志誠應夙聞尚書璿璣玉衡以齊七政崔瑗

所謂數術窮天地制作倖造化經志所云圖憲所本故
體度不渝精測尚矣則七晷運變無匪康時九代貞觀
不絕司厯臣夙懷末意懼干非任今忝惟職統敢昧死
以聞

為齊竟陵王世子臨會稽表

此郡歌風蹈雅既髣髴於淹中春誦夏絃實依稀於河
上頃者以來稍有訛替可推擇明經式寄儒職使琢玉
成器無爽昔談鑄金待價有符舊說

拜永嘉太守辭東宮表

抗志絕操
芟陸謝芻代
食賓土何獨匪民

書

釋何衡陽達性論書

前得所論深見弘慮崇致人道黜遠生類物有明微事
不愆義維情輔教足使異門掃軌況在蘄同豈忘所附
徒恐琴瑟專一更失闡諧故略廣數條取盡後報足下
云同體二儀共成三才者是必合德之稱非遭人之目

然總庶類同號衆生亦含識之名豈上哲之謚然則議
三才者無取於氓隸言衆生者亦何濫於聖智雖情在
序別自不患亂倫若能兩藉方教俱舉達義節彼離文
採此其實則可便倍害自和析符復合何詎快快執呂
以毀律且大德曰生有萬之所同同於所方萬豈得生
之可異不異之生宜其為衆但衆品之中愚慧羣差人
則役物以為養物則見役以養人雖始或因順終至裁
殘庶端萌起情嗜不禁生害繁慘天理鬱滅皇聖哀其

若此而不能頓奪所滯故設候物之教謹順時之經將
以開仁育識反漸息泰耳與道為心者或不劑此而止
又知大制生死同之榮落類諸區有誠亦宜然然神理
存沒儻異於枯芳變謝就同草木便當煙盡而復云三
后升遐精靈在天若精靈必在果異於草木則受形之
論無乃更資來說將由三后粹善報在生天邪欲毀後
生反立升遐當毀更立固知非立所除若徒有精靈尚
無體狀未知在天當何憑以立吾怯於庭斷故務求依

倣而進退思索未獲所安凡氣數之內無不感對施報之道必然之符言其必符何猜有望故遺惠者無要在功者有期期存未善去惠乃至人有賢否則意有公私不可見物或期報因謂樹德皆要且經世恆談貴施者勿憶士子服義猶惠而弗有況在聞道要更不得虛心而動必懷嗜事盡憚權邪曾不能引之上濟每驅之下淪雖深誚校責亦已厚言不代足下嬰城素堅難為飛書而吾自居憂患情理無託近辱褒告欲其布意裁往

釋慮不或值顏延之白

重釋何衡陽書

薄從歲事躬斂山田田家節隙野老為儔言止穀稼務
盡耕牧談年計耦無聞達義重獲微辨得用招慰啓告
精至愈慚固結今復妄書往懷以輸未述夫藉意探理
不若析之聖文三才之論故當本之三畫三畫既陳中
稱君德所以神致太上崇一元首故前謂自非體合天
地無以元應斯弘知研其清慮未肯存同猶以兼容罔

棄廣載不遺篤物之志誠為優瞻恐理位難越疑陽遂
衆若惻隱所發窮博愛之量恥惡所加盡祐直之正則
上仁上義吾無間然但情之者寡利之者衆預有其分
而未臻其極者不得以配擬二儀耳今方便極者為師
不極者為資扶其敬讓去其忮爭令鑿斧鑄刀利害寢
端驅百代之民出信厚之塗則何萌不滋何善不援而
誣以不實未值其意三才等列不得取偏才之器衆生
為號不可濫無生之人故此去氓隸彼甄聖智兩籍俱

舉旨在於斯若僑札未能道一皇王豈獲上附伊顏猶
共賴氣化宜乎下麗二塗之判易於頤指又知以人生
雖均被大德不可謂之衆生譬聖人雖同稟五常不可
謂之衆人夫不可謂之衆人以茂人者神明也今已均
被同衆復何諱衆同故當殊其特靈不應異其得生徒
忌衆名未虧衆實得無似蜀梁逃畏卒不能避所謂役
物為養見役養人者欲言愚慧相傾昏冥相制事由智
出作非天理是以始矜萌起終哀鬱滅豈與足下芻豢

百品共其指歸凡動而益流下民之性化而裁之上聖之功謹為垣防猶患踰盜況乃罔不備設以克侈志方開所泰何議去甚故知慘物之談不得與薄夫同憂樂殺意偏好生情博所云與道為心者博乎生情將使虛排率遂跖實莫反利澤通天而不為惠庸適恩止麝卵事法豺獾邪推此往也非惟自己不復往咎市鄽乎庖厨且市庖之外非無御養神農所書中散所述公理美其事仲彥精其業是亦古有其傳今聞其人何必以刳

剗為稟和之性燭淪為翼善之具哉若以編戶難齊憂
鄙論未立是見二叔不咸慮周德先亡儻能伸以遠圖
要之長世則日計可滿歲功可期精靈草木果已區別
遊魂之答亦精靈之說若雖有無形天下寧有無形之
有顧此惟疑宜見正定仲尼不答有無未辨足下既辨
其有豈得同不辨之答雖子嗜學懼未獲所附或是曉
晦塗隔隱著事懸遂令明月廢照世智限心知謂必符
之言體之極於罔請求反意如非相盡或世人守璞受

讓玉市將譚胥牽俗還說國情苟未照盡請復具仲近
釋報施首稱氣數者以為物無妄然各以類感感類之
中人心為大心術之動隸厯所不能得及其積致於可
勝原而當斷取世見據為高證莊周云莽鹵滅裂報亦
如之孫卿曰報應之勢各以類至後身著戒可不敬與
慈護之人深見此數故正言其本非邀其末長美遏惡
反民大順濟有生之類入無死之地令慶周兆物尊冠
百神安宜祚極子胥福限卿相而已常善以救善亦從

之勢猶影表不慮自來何言乎要惠悅報疑罪勤施似
由近驗吝情遠猜德教故方罰矜功而濫咎亡賢遺存
異義公私殊意已備前白若不重云想處實陋華者復
見其居厚去薄耳若施非周急惠而期譽乃如之人誠
道之蠹惟子之恥丘亦恥之

又釋何衡陽書

聖慮難原神應不測中散所云中人自竭莫得其端豈
其淺斥所可深抽徒以魏文大布見刊異世滕脩蝦鬚

取愧當時故於度外之事怯以意裁耳足下已審其虛實方書之不朽獨鑒堅精難復疑問聊寫餘懷依答條釋事緯殃福義雜胡華雖存簡章自至煩文過此以往余欲無言

答曰若如論旨以三畫為三才則初擬地爻三議天位然而遯世無悶非厚載之目君子乾乾非蒼蒼之稱果兩儀罔託亦何取於立人但爻在中和宜應君德耳釋曰聞之前學淳象始於三畫兼卦終於六爻三畫立本

三才之位六爻未變羣龍所經是以重卦之後則以出處明之故遯世乾乾潛藏皆行聖人適時之義兼之道也若以初爻非地三位非天以為兩儀罔託立人無取未知足下前論三才同體何因而生若猶受之繫說不軌師訓何獨得之複卦喪之單象如義文之外更有三才此自春秋新意吾無識焉且遯世乾乾雖非覆載之名一體之中未失卑高之實豈得以變動之辭廢立本之義又知以爻在中和宜應君德若徒有中和之爻竟

無中和之人則又將何放若中和在德則不得人皆中和體合之論固未可殊越

答曰上仁上義便是計體仁義者為三才尋又云僞札未獲上附伊顏宜其下麗則黃裳之人其猶弗及雖賸之旨高下無准故惑者未悟釋曰所云上仁上義謂兼總仁義之極可以對饗天地者耳非謂少有恥愛便為三才前釋已具怪復是問肆彼域中惟王是體知三此兩儀非聖不居易者同歸可無重惑案東魯階差僞札

理不允備何由上附至位依西方準墨伊顏未獲法身
故當下麗生品來論挾姬議釋故兩解此意冀以取了
反致辭費聖作君師賢為臣資接暢神功影響大業行
藏可共默語亦同體分至此何負黃裳議者徒見不得
等位元首橫主誚恨而不知引之極地更非守節之情
指斷如斯何謂無準

答曰夫陰陽陶氣剛柔賦性圓首方足容貌匪殊惻隱
恥惡悠悠皆是但參體二儀必舉仁義為端耳釋曰若

謂圓首方足必同恥慚隱之實容貌匪殊皆可參體二儀蹻跼之徒亦當在三才之數邪若誠不得則不可見橫目之同便與大人同列悠悠之論品量難齊既云仁者安仁智者利仁又云力行近仁畏罪強仁若一之正位將真偽相冒莊周云天下之善人寡不善人多其分若此何謂皆是

答曰知欲限以名器慎其所假遂令惠人潔士比性於毛羣庶幾之賢同氣於介族立衆之意豈其然乎釋曰

名器有限良由資體不備雖欲假之疑陽謂何含靈為人毛羣所不能同稟氣成生潔士有不得異象放其靈非象其生一之而已無乃誣漫

答曰已均被同衆云云特靈之神既異於衆得生之理何嘗暫同生本於理而理異焉同衆之生名將安附若執此生名必使從衆則混成之物亦將在例邪釋曰吾前謂同於所方豈得生之可異足下答云非謂不然又曰奚取不異之生必宜為衆是則去吾為衆而取吾不

異豈有不異而非衆哉所以復云故當殊其特靈不應
異其得生耳今答又謂得生之理何嘗暫同生本於理
而理異焉請問得生之理故是陰陽邪吾不見其異而
足下謂未嘗暫同若有異理非復煦蒸邪則陰陽之表
更有受生塗趨三世詎宜堅立使混成之生與物同氣
豈混成之謂若徒假生名莫見生實則非向言之匹言
生非生即是有物不物李叟此說或更有其義以無詰
有頗為未類

答曰謹為垣坊云云始云皇聖設候物之教謹順時之
經將以反漸息泰今復以方開所泰為難未詳此將難
鄙議為譏聖人也釋曰前觀本論自九穀以下至孔鈞
不綱始知高議謂凡有宰作皆出聖人躬為尸匠以率
先下民也孤鄙拙意自謂每所施為動必有因聖人從
為之節使不遷越此二懷之大斷彼我所不同吾將節
其奢流故有息泰之說足下方明備設未知於何去甚
而中答又云所謂甚者聖人固已去之不了此意故近

復以所泰為問答云未詳誰難或自忌前報

答曰市庖之外云云夫禋瘞繭栗宗社三牲腍腳豆俎以供賓客七十之老俟肉而飽豈得惟陳草石取備上藥而已而憂不立者非謂洪論難持還嫌此事不可頓去於世耳釋曰神農定生周人備教既唱粒食又言上藥既用犧牢又稱蘋蘩祭膳之道故無定方前舉市庖之外復有御養者捐奪剝淪之滯以明延性不一非謂經世之事皆當取備草石然芻豢之功希至百齡芝朮

之懿亟聞千歲由是言之七十之老何必謝恩於肉食
但自封一域者捨此無術耳想不可頓去於世猶是前
釋所云不能頓奪所滯也始獲符同敢不歸美既知不
可頓去或不謂道盡於此

答曰天下寧有無形之有云云尋來旨似不嫌有鬼當
謂鬼宜有質得無惑天竺之書說鬼別為生類邪昔人
以鬼神為教乃列於典經布在方策鄭僑吳札亦以為
然是以雲和六變寶降天神龍門九成人鬼咸格足下

雅秉周禮近忽此義方詰無形之有為支離之辯乎釋
曰非惟不嫌有鬼乃謂有必有形足下不無是同處有
復異是以比及質詰欲以求盡請捨天竺之說謹依中
土之經又置別為生類共議登遐精靈體狀有無固然
宜報定典策之中鬼神累萬所不了者非其名號比獲
三論每來益衆萬鬼畢至竟未片答雖啓告周博非解
企渴無形之有既不匠立徒謂支離以為通說若以覈
正為支離者將以浮漫為直達乎

答曰後身著戒云云未詳所謂慈護者誰氏之子若據外書報應之說皆吾所謂權教者耳凡講求至理曾不析之聖言多採譎怪以相扶翼得無似以水濟水乎釋曰慈護之主計亦久聞其人責以誰子將以文殊釋氏知謂報應之說皆是權教權道隱匿非聖不盡雖子通識慮亦未見其極吾疲於推求而足下逸於獨了良有惡然若權教所言皆為欺妄則自然之中無復報應吾懦於擊決足下烈於專斷亦又懼焉神高聽卑庸可誣

哉想云聖言者必姬孔之誥今之所談皆其信順之事而謂曾不析之復是未經詳思來論立姬廢釋故吾引釋符姬答不越問未覺多採由金日碑不生華壤何限九服之外不有窮理之人內外為判誠亦難乎若自信其度獨思耳目習識之表皆為譎怪則吾亦已矣

答曰又云物無妄然必以類感云云斯言果然則類感之物輕重必侔影表之勢脩短有度致飾土木不發慈愍之心順時蒐狩未根慘虐之性天宮華樂焉賞而上

升地獄幽苦奚罰而淪陷唱言窮軒輕立法無衡石一
至於此釋曰影表之說以徵感報來意疑不必侔嫌其
無度即復除福應也福應非他氣數所生若減福應即
無氣數矣足下功存步驗而還伐所知想信道為心者
必不至此若謂不慈於土木之飾有甚於順時之殺者
無乃大負夫人之心黃屋玉璽非必堯舜之情崇居麗
養豈是釋迦之意責天宮之賞求地獄之罰頗類昔人
亞夫之詰英布之問有味乎其言此蓋衆息心之所詳

吾可得而略之

答曰且阿保傳愛慎及溷腴良庖提刀情怵介族彼聖人者明並日月化闢三統若令報應必符亦何妨於教而緘局義唐之紀埋閉周孔之世肇結網罟興累億之罪仍制牴牢開長夜之罰遺彼天厨甘此芻豢曾無拯溺之仁橫成納隍之酷具為不然宜簡淵慮若謂窮神之智猶有不盡雖高情愛竒想亦未至於侮聖釋曰知謂報應之義緘義周之世以此推求為不符之證義唐

邈矣人莫之詳尚書所載不過數篇方言德刑之美遑
記禍福之源今帝典王策猶不書性命之事而微闕文
以為古必無之斯亦師心之過也且信順殃慶咸列姬
孔之籍謂之埋閉如小逕并但言有遠近教有淺深故
使智者與此而奪彼邪夫生必有欲欲必有求欲歟則
爭求給則恬爭則相害恬則相安網罟之設將蠲害以
取安乎且畋漁牲牢其事不異足下前答已知牲牢不
可煩去於今世復謂畋漁不可獨棄於古未為通類矣

好生惡死每下愈篤故宥其死者順其情奪其生者逆其性至人尚矣何為犯順而居逆哉是知不能頓奪所滯故因為之制耳聖靈雖茂無以叡蒙昏之心弱喪之民何可勝論罪罰之來將物自取之事遠難致不由天厨見遺物近易耽故常芻豢是甘拯溺出隍衆哲所共但化物不同非道之異不盡之讓亦如過當子長愛竒本不類此

答曰足下論仁義則云情之者少利之者多言施惠則

許其遺賢忘報在情既少孰能遺賢利之者多曷云亡
報若能推樂施之士以期欲仁之疇演忘報之意引向
義之心則義寔在斯求仁不遠釋曰情仁義者寡利仁
義者衆聞之莊書非直孤說未獲詳校遽見彈責夫在
情既少利之者多不能遺賢曷云忘報實吾前後勤勤
以為不得配擬二儀者耳復非篤論所應據正若樂施
忘報即為體仁忘報而施便為合義可去欲字并除向
名在斯不遠誰不是慕

答曰濟有生之類云云斯旨宏誕非本論所及無乃秦師將遁行人言肆乎釋曰足下論挾姬釋吾亦答兼戒周足下以此抑彼謂福及高門吾伸彼釋此云慶周兆之物足下據此所見謂祚止公侯吾信彼所聞云尊冠百神本議是爭曷云不及夫論難之本以易奪為體失之已外輒云宏誕求理之塗幾乎塞矣師遁言肆或不在此

答曰豈其相迫居吾語子聖人在上不與百神爭長有

始有卒焉得無死之地云云釋曰豈具相迫一何務德
居吾語子又何壯辭凡為物之長豈爭之所得非惟不
爭必將下之不可見尊冠百神便謂與百神爭長無乃
取之勝薛棄之體仁知謂物有始卒無不死之地求之
域內實如來趣前釋所謂勝類諸區有誠亦宜然者也
至如山經所圖仙傳所記事關世載已不可原况復道
絕恆情理隔常照必以於我不然皆當絕棄此又所不
得安

答曰夫辯章幽明研精庶物云云釋曰逮省此章盛陳
列代文博體周頗善師法歌誦聖世足為繁聲討求道
義未是要說耳昔在幼壯微涉羣紀皇王之軌賢智之
迹側聞其略敢辱其詳惠示之篤實勤執事

答曰何必陋積慶之延祚希無驗於來生蹲膜揖讓終
不竝足竊願吾子捨兼而遵一云云釋曰不陋積慶已
伸信順之條貫希來生之驗亦具感報之說藻衮大裘
同用一體蹲膜揖讓何為不俱行一世理有可兼無謂

宜捨

答曰蜀梁二叔甘人譯胥之譬非本論所經故不復具
云釋曰近此數條聊發戲端亦猶越人問布見採於前
談肄業及之無相多怪然二叔為問欲以却編戶之疑
沒而不答誠有望焉足下連國雲從宏論風行吾幽生
孤說每獲竊議此之不侔事有固然實由通才所共者
理歛忘其煩貪復息心

與王微書

圖畫非止藝行成當與易象同體而工篆隸者自以書巧為高

弔張茂度書

張敷父喪毀瘠成疾世父茂度每譬止之輒更哀慟未暮而卒延之書弔茂度

賢弟子少履貞規長懷理要清風素氣得之天然言面以來便中忘年之好比雖艱隔成阻而情問無睽薄莫之人冀其方見慰說豈謂中年奄為長往聞問悼心有兼恆痛足下門教敦至兼實家寶一旦喪失何可為懷

與王曇生書

王弘之卒延之欲為作誄書
與弘之子曇生誄竟不就

君家高世之節有識歸重豫染毫翰所應載述況僕託
慕末風竊以叙德為事但恨短筆不足書美

序

三月三日曲水詩序

夫方策既載皇王之迹已殊鐘石畢陳舞詠之情不一
雖淵流遂往詳略異聞然其宅天衷立民極莫不崇尚

其道神明其位拓世貽統固萬葉而為量者也有宋函
夏帝圖弘遠高祖以聖武定鼎規同造物皇上以敷文
承厯景屬宸居隆周之卜既永宗漢之兆在焉正體毓
德於少陽王宰宣哲於元輔晷緯昭應山瀆効靈五方
雜遝四隩來暨選賢建戚則擇之於茂典施命發號必
酌之於故實大予協樂上庠肆教章程明密品式周脩
國容眡令而動軍政象物而具歲闕記言校文講藝之
官采遺於內輜車朱軒懷荒振遠之使諭德於外蘋莖

素毳并柯共穗之瑞史不絕書棧山航海踰沙軼漠之
貢府無虛月烈燧千城通驛萬里穹居之君內首稟朔
卉服之酋迴而受吏是以異人慕嚮俊民間出警蹕清
夷表裏悅穆將徙縣中宇張樂岱郊增類帝之壇飭禮
神之館塗歌邑誦以望屬車之塵者久矣日纏胃維月
軌青陸皇祗發生之始后王布和之辰思對上靈之心
以惠庶氓之願加以二王于邁出餞戒告有詔掌故爰
命司厯獻洛飲之禮具上巳之儀南除輦道北清禁林

左闕巖陞右梁潮源略亭臯跨芝廬苑太液懷曾山松
石峻崦葱翠陰煙游泳之所攢萃翔驟之所往還於是
離宮設衛別殿周徽旌門洞立延帷接榼閱水環階引
池分席春官聯事蒼靈奉塗然後升秘駕肩緹騎搖玉
鑾發流吹天動神移淵旋雲被以降於行所禮也既而
帝暉臨幄百司定列鳳蓋俄軫虹旗委旆肴藪芬藉觴
醴泛浮妍歌妙舞之容銜組樹羽之器三奏四上之調
六莖九成之曲競氣繁聲合變爭節龍文飾轡青翰侍

御華胥殷至觀聽驚集揚袂風山舉袖陰澤靚裝藻野
絃服縟川故以殷賑外區煥衍都內者矣上膺萬壽下
禔百福市筵稟和闔堂依德情盤景遽歡洽日斜金駕
總駟聖儀載佇悵釣臺之未臨慨鄴宮之不縣方且排
鳳闕以高游開爵園而廣宴竝命在位展詩發志則夫
誦美有章陳信無愧者歟

七

七繹

北岳生剗迹埋名身閒事盡道畜山局東國進士謬與
遷焉其居也依隱堪陰結架清深巖屋橋構磴道相臨
寒榮隴首綺飲江潯客曰周以巖廊匝以綵房木寫雲
氣土秘羣芳既旋天而倒井又斲員而縷方松丘箭渚
藥苑香林梁澗道以高濟棧巖磴而上尋客曰若夫舟
山之奧金門之秘地首岷銅川上汶泗裁石成音調金
為器故列真玩其微鳴辭人賦其清懿若乃梓漆簡聲
麗容呈才陳舞態開吹臺獵悲風遡秋埃既而昵宿獻

壽中人奉膳有悄者顏弗怡高殿視華鼓之繁桴聽邊
笳之嘶轉飛朱鷺以首引逮玄雲而終變然後簪珥搖
暉莊服流涵抗妍歌以跼躑揚輕袖而翳面雜紛披於
巾拂迤間闕乎槃扇

庭誥文

庭誥者施於閨庭之內謂不遠也吾年居秋方慮先草
木故遽以未聞誥爾在庭若立履之方規鑒之明已列
通人之規不復續論今所載咸其素畜本乎生靈而致

之心用夫選言務一不尚煩密而至於備議者蓋以網諸情非古語曰得鳥者羅之一目而一目之羅無時得鳥矣此其積意之方道者識之公情者德之私公通可以使神明如嚮私塞不能令妻子移心是以昔之善為士者必捐情反道合公屏私尋尺之身而以天地為心數紀之壽常以金石為量觀夫古先垂戒長老餘論雜用細制每以不朽見銘繕築末迹咸以可久承志況樹德立義收族長家而不思經遠乎曰身行不足遺之後人

欲求子孝必先慈將責弟悌務為友雖孝不待慈而慈
固植孝悌非期友而友亦立悌夫和之不備或應以不
和猶信不足焉必有不信儻知恩意相生情理相出可
使家有參柴人皆由損夫內居德本外夷民譽言高一
世處之逾嘿器重一時體之茲沖不以所能干眾不以
所長議物淵泰入道與天為人者士之上也若不能遺
聲欲人出已知柄在虛求不可校得敬慕謙通畏避矜
踞思廣監擇從其遠猷文理精出而言稱未達論問宣

茂而不以居身此其亞也若乃聞實之為貴以辯畫所
克見聲之取榮謂爭奪可獲言不出於戶牖自以為道
義久立才未信於僕妾而曰我有以過人於是慮苟銳
之志馳傾軋之望豈悟已挂有識之裁入修家之誡乎
記所云千人所指無病自死者也行近於此者吾不願
聞之矣凡有知能預有文論不練之庶士校之羣言通
才所歸前流所與焉得以成名乎若呻吟於牆室之內
喧囂於黨輩之間竊議以迷寡聞姐語以敵要說是短

算所出而非長見所上適值尊朋臨座稠覽博論而言
不入於高聽人見棄於衆視則慌若迷塗失偶厯如深
夜撤燭銜聲茹氣腴嘿而歸豈識向之夸慢祇足以成
今之沮喪邪此固少壯之廢爾其戒之夫以怨誹為心
者未有達無心救得喪多見誚耳此蓋臧獲之為豈識
量之為事哉是以德聲令氣愈上每高忿言懟譏每下
愈發有尚於君子者寧可不務勉邪雖曰恒人情不能
素盡故當以遠理勝之公竿除之豈可不務自異而取

陷庸品乎富厚貧薄事之懸也以富厚之身親貧薄之人非可以一時處然昔有守之無怨安之不悶者蓋有理存焉夫既有富厚必有貧薄豈其證然時乃天道若人皆厚富是理無貧薄然乎必不然也若謂富厚在我則宜貧薄在人可乎又不可矣道在不然義在不可而橫意去就謬生希幸以為未達至分蠶溫農飽民生之本躬稼難就上以僕役為資當施其情願庀其衣食定其當治遞其優劇出之休養後之捶責雖有勸恤之勤而

無霑曝之苦務前公稅以遠吏讓無急傍費以息流議
量時發斂視歲穰儉省贍以奉已損散以及人此用天
之善御生之得也率下多方見情為上立長多術晦明
為懿雖及僕妾情見則事通雖在畎畝明晦則功博若
奪其當然役其煩務使威烈雷霆猶不禁其欲雖棄其
大用窮其細瑕或明灼日月將不勝其邪故曰孱焉則
差的焉則闇是以禮道尚優法意從刻優則人自為厚
刻則物相為薄耕收誠鄙此用不忒所謂野陋而不以

居心也含生之氓同祖一氣等級相傾遂成差品遂使業習移其天識世服沒其性靈至夫願欲情嗜宜無間殊或役人而養給然是非大意不可侮也隅奧有竈齊侯蔑寒犬馬有秩管燕輕饑若能服溫厚而知穿弊之苦明周之德厭滋旨而識寡嗛之急仁恕之功豈與夫比肌膚於草石方手足於飛走者同其意用哉罰慎其濫惠戒其偏罰濫則無以為罰惠偏則不如無惠雖爾眇末猶扁庸保之上事思反已動類念物則其情得而

人心塞矣。抃搏蒲塞會衆之事，諧調哂謔適坐之方，然失敬致侮，皆此之由。方其尅瞻彌喪，端儼況遭非鄙，慮將醜折，豈若拒其容而簡其事，靜其氣而遠其意，使言必諍，慝賓友清耳笑，不傾嫵，左右悅目，非鄙無因而生。侵侮何從而入此？亦持德之管籥爾。其謹哉！嫌惑疑心，誠亦難分。豈唯厚貌蔽智之明，深情怯剛之斷而已哉？必使猜怨愚賢，則嘖笑入戾，期變犬馬，則步顧成妖。況動容竊斧，束裝濫金，又何足論？是以前王作典，明慎議。

獄而僭濫易意朱公論壁光澤相如而倍薄異價此言雖大可以戒小游道雖廣交義為長得在可久失在輕絕久由相敬絕由相狎愛之勿勞當扶其正性忠而勿誨必藏其枉情輔以藝業會以文辭使親不可褻疎不可間每存大德無挾小怨率此往也足以相終酒酌之設可樂而不可嗜嗜而非病者希病而遂青者幾既青既病將蔑其正若存其正性紓其妄發其唯善戒乎聲樂之會可簡而不可違違而不背者鮮矣背而非弊者

反矣既弊既背將受其毀必能通其礙而節其流意可
為和中矣善施者唯發自人心乃出天則與不待積取
無謀實竝散千金誠不可能贍人之急雖乏必先使施
如王丹愛如杜林亦可與言交矣浮華怪飭滅質之具
奇服麗食棄素之方動人勸慕傾人顧盼可以遠識奪
難用近欲從若覩其淫怪知生之無心為見奇麗能致
諸非務則不抑自貴不禁自止夫數相者必有之徵既
聞之術人又驗之吾身理可得而論也人者兆氣二德

稟體五常二德有奇偶五常有勝殺及其為人寧無叶
沴亦猶生有好醜死有天壽人皆知其懸天至於丁年
乖遇中身迂合者豈可易地哉是以君子道命愈難識
道愈堅古人恥以身為溪壑者屏欲之謂也欲者性之
煩濁氣之蒿蒸故其為害則燠心智耗真情傷人和犯
天性雖生必有之而生之德猶火含煙而妨火桂懷蠹
而殘桂然則火勝則煙滅蠹壯則桂折故性明者欲簡
嗜繁者氣昏去明即昏難以主一日其以中外羣聖建

言所黜儒道衆智發論是除然有之者不患誤深故藥之
者恒苦術淺所以毀道多而義寡頓盡誠難每指可易
能易每指亦明之末廉嗜之性不同故畏慕之情或異
從事於人者無一人我之心不以己之所善謀人爲有
明矣不以人之所務失我能有守矣己所謂然而彼定
不然奕棋之蔽悅彼之可而忘我不可學頓之蔽將求
去蔽者念通作介而已流言謗議有道所不免況在闕
薄難用算防接應之方言必出己或信不素積嫌間所

襲或性不和物尤怨所聚有一于此何處逃毀苟能反
悔在我而無責於人必有達鑒昭其情遠識迹其事日
省吾躬月料吾志寬嘿以居潔靜以期神道必在何恤
人言嘖曰富則盛貧則病矣貧之病也不唯形色羸瘵
或亦神心沮廢豈但交友疎棄必有家人誚讓非廉深
遠識者何能不移其植故欲蠲憂患莫若懷古懷古之
志當自同古人見通則憂淺意遠則怨浮昔琴歌于編
蓬之中者用此道也夫信不逆彰義必出隱交賴相盡

明有相照一面見旨則情固丘岳一言中志則意入淵泉以此事上水火可蹈以此託友金石可弊豈待克其榮實乃將議報厚之筐筐然後圖終如或與立茂思無忽祿利者受之易易則人之所榮蠶穉者就之艱艱則物之所鄙艱易既有勤倦之情榮鄙又間向背之意此二塗所為反也以勞定國以功施人則役徒屬而擅豐麗自理於民自事其主則督妻子而趨耕織必使陵侮不作懸企不萌所謂賢鄙處宜華野同泰人以有惜為

質非假嚴刑有恒為德不慕厚貴有惜者以理葬有恒者與物終世有位去則情盡斯無惜矣又有務謝則心移斯不恒矣又非徒若此而已或見人休事則懃斲結納及聞否論則處彰離貳附會以從風隱竊以成釁朝吐面譽暮行背毀昔同稽歎今猶叛戾斯為甚矣又非唯若此而已或憑人惠訓藉人成立與人餘論依人揚聲曲存稟仰甘赴塵軌衰沒畏遠忌聞影迹又蒙之毀之無度心短彼能私樹已拙自崇恒輩罔顧高識有人

至此實蠢大倫每思防避無通間伍覩驚異之事或無
涉傳遭卒迫之變反思安順若異從已發將尸謗人迫
而又迂愈使失度能夷異如裴楷處逼如裴遐可稱深
士乎喜怒者有性所不能無常起於褊量而止於弘識
然喜過則不重怒過則不威能以恬漠為體寬愉為器
者大喜蕩心微抑則定甚怒煩性小忍即歇動無愆容
舉無失度則物將自懸人將自止習之所變亦大矣豈
惟蒸性染身乃將移智易慮故日與善人居如入芝蘭

之室久而不聞其芬與之化矣與不善人居如入鮑魚之肆久而不知其臭與之變矣是以古人慎所與處唯夫金真玉粹者乃能盡而不汚爾故曰丹可滅而不能使無赤石可毀而不能使無堅苟無丹石之性必慎浸染之繇能以懷道為人必存從理之心道可懷而理可從則不議貧議所樂耳或云貧何繇樂此未求道意道者瞻富貴同貧賤理固得而自我喪之未為通議苟議不喪夫何不樂或曰溫飽之貴所以榮生饑寒在躬空

曰從道取諸其身將非篤論此又通理所用凡生之具
豈簡定實或以膏腴天性有以菽藿登年中散云所足
與不繇外是以稱體而食貧歲愈嗛量腹而炊豐家餘
冷非粒實息耗意有盈虛爾況心得復劣身獲仁富明
白入素氣志如神雖十旬九飯不能含饑業席三屬不
能為寒豈不信然且以已為度者無以自通彼量渾四
游而幹五緯天道弘也振河海而載山川地道厚也一
情紀而合流貫人靈茂也昔之過乎此數者不為剖判

之行必廣其風度無挾私殊博其交道無懷曲異故望
塵請友則義士輕身一遇拜親則仁人投分此倫序通
允禮俗平一上獲其用下得其和世務雖移前休未遠
人之適主吾將反本三人至生慙有之識幼壯驟過衰
耗驚及其間天鬱既難勝言假獲存遂又云無幾柔麗
之身亟委土木剛清之才遽為丘壤回遑顧慕雖數紀
之中爾以此持榮曾不可留以此服道亦何能平進退
我生游觀所達得貴為人將在含理含理之貴惟神與

交幸有心靈義無自惡偶信天德逝不上慙欲使人沈
來化志符往哲勿謂是賒日鑿斯密著通此意吾將忘
老如固不然其誰與歸值懷所撰畧布衆修若備舉情
見顧未書一瞻身之經別在田家節政奉終之紀自著
燕居畢義

又

達見同善通辯異科一曰言道二曰論心三曰校理言
道者本之於天論心者議之於人校理者取之於物從

而別之繇塗參陳要而會之終致可一若夫玄神之經
窮明之說義兼三端至無二極但語出梵方故見猜世
學事起殊倫故獲非恒情天之賦道非差胡華人之稟
靈豈限外內一以此思可無臆裁為道者蓋流出於仙
法故以練形為上崇佛者本在於神教故以治心為先
練形之家必就深曠反飛靈樛丹石粒芝精所以還年
却老延華駐彩欲使體合纁霞軌徧天海此其所長及
偽者為之則忌災崇課粗願混士女亂妖正此其巨蠹

也治心之術必辭親偶閑身性師淨覺信緣命所以反
壹無生尅成聖業智邈大明志狹恒劫此其所貴及詭
者為之則藉髮落狎菁華傍榮聲謀利論此其甚誣物
有不然事無不弊衡石日陳猶患差忒況神道不形固
衆端之所假未能體神而不疑神無者以為靈性密微
可以積理知洪變歟况可以大順待照若鏡天肅若窺
淵能以理順為人者可與言有神矣若乃罔其真而青
其弊是未加心照耳

頌

碧芙蓉頌

澤芝芳豔擅奇水屬練氣紅荷比符縹玉擢麗滄池飛
映雲屋寶紀僊方名書靈躅

赤瑾頌

日御北至夏德南宣玉蒸榮心氣動上玄華縹間物受
色朱天是謂珍樹含艷丹間

贊

蜀葵贊

井維降精崕絡升靈物微氣麗卉草之英渝豔衆葩冠
冕羣英類麻能直方葵不傾

箴

大筮箴

余因讀易偶意著龜友人有請決遊宦務志卦有咎占
故作大筮箴以悟焉

先王設筮大人盡慮卦遭同人變而之豫先號後笑初

睽未遇時至運來當在三五功畢官成幾乎衍數慶在
坤宮災在坎路不出戶庭獨立無懼違此而動投足失
步無愔爾儀靈骨有知無曰余逆神災不豫南人司箴
敢告馳驚

連珠

範連珠

蓋聞匹夫履順則天地不違一物投誠則神明可交事
有微而愈著理有闇而必昭是以魯陽傾首離光為之

反舍有烏拂波河伯為之不潮

謚議

宋武帝謚議

以為聖哲同風功美殊稱蓋出乎道者無方故刑於物者不一伏維道塞人神信通期運愛敬所稟因心則遠英粹之照正性自天體苞潛躍慮周卷舒龍德在陰雖艱貞而不悶因時而惕故有來其必亨在晉之季皇塗荐阻櫬槍千紀璇璣失馭天鑒靈武民屬聖明不假十

室之資不藉百乘之賦首義馳風一鼓靜亂滌除泰階
消殞薄蝕斯亮登庸之基經綸之始者也內難雖弭外
圖未輯河華海岱負固相望荆濮燕亳侯服交侵眷言
帝畿思康王路戎不再駕遺氓卽序斥堠之所未羈亭
徼之所不譯莫不飾誠請罪欵塞來賓故能洒掃中嶽
致廟九山神道會昌寶命既集損之而益後身愈先既
而儀形帝載揖讓天厯改玉乎文祖班瑞於神宗貫革
寢機文武搢笏故宸居兩楹坐一八表國訓成均之學

家沾撫辜之仁大美配天必終之以儉德道固萬葉猶
申之以話言允所謂教思無窮樹之長世取高上代顧
邈前王矣

哀策文

宋文帝元后哀策文

維元嘉十七年七月二十六日大行皇后崩於顯陽殿
粵九月二十七日將遷座於長寧陵禮也龍輅纚紵容
翟結轡皇塗昭列神路幽嚴皇帝親臨祖饋躬瞻宵載

飾遺儀於組紱淪徂音乎珩珮悲黼筵之移御痛暈綸
之重晦降輿客位撤奠殯階乃命史臣累德述懷其辭
曰

倫昭儷昇有物有憑圓精初爍方祗始凝昭哉世族祥
發慶膺祕儀景胄圖光玉繩昌暉在陰柔明將進率禮
蹈和稱詩納順爰自待年金聲夙振亦既有行素章增
絢象服是加言觀維則俾我皇風始基嬪德惠問川流
芳猷淵塞方江泳漢載謠南國伊昔不造鴻化中微用

集寶命仰陟天機釋位公宮登曜紫闥欽若皇姑允迪
前徽孝達寧親敬行宗祀進思才淑傍綜圖史發音在
詠動容成紀壺政穆宣房樂韶理坤則順成星軒潤飾
德之所屆惟深必測下節震騰上清腴側有來斯雍無
思不極謂道輔仁司化莫晰象物方臻眡祲告沴太和
既融收華委世蘭殿長陰椒塗弛衛嗚呼哀哉戒涼在
律杪秋即空霜夜流唱曉月升魄入神警引五輅遷跡
噉噉儲嗣哀哀列辟灑零玉墀雨泗丹掖撫存悼亡感

念懷昔嗚呼哀哉南背國門北首山園僕人按節服馬
顧轅遙酸紫蓋眇泣素軒滅綵清都夷體壽原邑野淪
靄戎夏悲謹來芳可逯往駕弗援嗚呼哀哉

誄

陶徵士誄

夫璿玉致美不為池隍之寶桂椒信芳而非園林之實
豈其樂深而好遠哉蓋云殊性而已故無足而至者物
之籍也隨踵而立者人之薄也若乃巢由之抗行夷皓

之峻節故已父老堯禹錙銖周漢而綿世寢遠光靈不
屬至使菁華隱沒芳流歇絕不亦惜乎雖今之作者人
自為量而首路同塵輟塗殊軌者多矣豈所以昭末景
泛餘波乎有晉徵士潯陽陶淵明南嶽之幽居者也弱
不好弄長實素心學非稱師文取指達在衆不失其寡
處言每見其嘿少而貧苦居無僕妾井臼弗任藜藿不
給母老子幼就養勤匱遠惟田生致親之議追悟毛子
捧檄之懷初辭州府三命後為彭澤令道不偶物棄官

從好遂乃解體世紛結志區外定迹溪棲於是乎遠灌
畦鶩蔬為供魚菽之祭織絢緯蕭以克糧粒之費心好
異書性樂酒德簡棄煩促就成省曠殆所謂國爵屏貴
家人忘貧者歟有詔徵著作郎稱疾不赴春秋六十有
三元嘉四年月日卒於潯陽縣之柴桑里近識悲悼遠
士傷情冥默福應嗚呼淑貞夫實以誄華名由謚高苟
允德義貴賤何算焉若其寬樂令終之美好廉克已之
操有合謚典無愆前志故詢諸友好宜謚曰靖節徵士

其詞曰

物尚孤生人固介立豈伊時邁曷云世及嗟乎若士望
古遙集韜此洪族蔑彼名級睦親之行至自非敦然諾
之信重於布言廉深簡潔貞夷粹溫和而能峻博而不
繁依世尚同詭時則異有一於此而兩默置豈若夫子
因心違事畏榮好古薄身厚志世霸虛禮州壤推風孝
惟義養道必懷邦人之秉彜不隘不恭爵同下士祿等
上農度量難鈞進退可限長卿棄官稚賓自免子之悟

之何悟之辯賦辭歸來高蹈獨善亦既超曠無適非心
汲流舊獻葺宇家林晨煙暮靄春煦秋陰陳書綴卷置
酒絃琴居備勤儉躬兼貧病人否其憂子然其命隱約
就閒遷延辭聘非直也明是惟道性糾纏幹流冥漠報
施孰云與仁實疑明智謂天益高胡讐斯義履信易憑
思順何寘年在中身疾維疔疾視化如歸臨凶若吉藥
劑弗嘗禱祠非恤僚幽告終懷和長畢嗚呼哀哉敬述
清節式遵遺占存不願豐沒無求瞻省訃却賻輕哀薄

斂遭壤以穿旋葬而窆嗚呼哀哉深心追往遠情逐化
自爾介居及我多暇伊好之洽接閭隣舍宵盤晝憇非
舟非駕念昔宴私舉觴相誨獨正者危至方則礙哲人
卷舒布在前載取鑑不遠吾規子佩爾寔愀然中言而
發遺衆速尤迂風先蹶身才非實榮聲有歇徽音永矣
誰箴余闕嗚呼哀哉仁焉而終智焉而斃黔婁既沒展
禽亦逝其在先生同塵往世旌此靖節如彼康惠嗚呼
哀哉

陽給事誄

惟永初三年十一月十一日宋故寧遠司馬濮陽太守
彭城陽君卒嗚呼哀哉瓚少稟志節資性忠果奉上以
誠率下有方朝嘉其能故授以邊事永初之末佐守滑
臺值國禍薦臻王略中否獮虜間釁剝司充幽并騎
弩屯逼鞏洛列營緣戍相望屠潰瓚奮其猛銳志不違
難立乎將卒之間以緝華裔之衆罷困相保堅守四旬
上下力屈受陷勅寇士師奔擾棄軍爭免而瓚誓命沈

城佻身飛鏃兵盡器竭斃於旗下非夫貞壯之氣勇烈
之志豈能臨敵引義以死殉節者哉景平之元朝廷聞
而傷之有詔曰故寧遠司馬濮陽太守陽瓚滑臺之逼
厲誠固守投命殉節在危無撓古之烈士無以加之可
贈給事中振卹遺孤以慰存亡追寵既彰人知慕節河
汴之間有義風矣逮元嘉廓祚聖神紀物光昭茂緒旌
錄舊勲苟有槩於貞孝者實事感於仁明末臣蒙固側
聞至訓敢詢諸前典而為之誄其辭曰

貞不常祐義有必甄處父勤君怨在登賢苦夷致果題
子行間忠壯之烈宜自爾先舊勲雖廢邑氏遂傳惟邑
及氏自溫徂陽孤續既降晉族弗昌之子之生立績宋
皇拳猛沈毅溫敏肅良如彼竹柏負雪懷霜如彼駢駟
配服驂衡邊兵喪律王略未恢函陝堙阻瀍洛蒿萊朔
馬東驚胡風南埃路無歸轡野有委骸帝圖斯艱簡兵
授才寔命陽子佐師危臺憬彼危臺在滑之坳周衛是
交鄭程是爭昔惟華國今實邊亭憑巘結關負河縈城

金拆夜擊和門畫局料敵厭難時惟陽生涼冬氣勁塞
外草衰過矣獫虜乘障犯威鳴驥橫厲霜鏑高輦軼我
河縣俘我洛畿攢鋒成林投鞍為圍翳翳窮壘嗷嗷羣
悲師老變形地孤援闊卒無半菽馬實捫秣守未焚衝
攻已濡褐烈烈陽子在困彌達勉慰瘡傷拊巡饑渴力
雖可窮氣不可奪義立邊疆身終鋒枯嗚呼哀哉賁父
隕節魯人是志汧督効貞晉策攸記皇上嘉悼思存寵
異於以贈之言登給事疏詩紀庸恤孤表嗣嗟爾義士

沒有餘喜嗚呼哀哉

祭文

為湘州祭虞舜文

惟哲化神繼天作聖藏器渙陶致身愛敬是以二妃嬪
德九子觀命在麓不迷御衡以正唐歷既終虞道乃光
咨堯授禹素俎采堂百齡厭世萬里陟方敬詢故老欽
咨聖君職奉西湘虔屬南雲神之聽之匪酒伊葷

為湘州祭屈原文

維有宋五年月日湘州刺史吳郡張邵恭承帝命建旗
舊楚訪懷沙之淵得捐珮之浦弭節羅潭艤舟汨渚乃
遣戶曹掾某敬祭故楚三閭大夫屈君之靈蘭薰而推
玉纁則折物忌堅芳人諱明潔曰若先生逢辰之缺溫
風迨時飛霜急節羸辛遺紛昭懷不端謀折儀尚貞蔑
椒蘭身絕郢闕迹徧湘干比物荃蓀連類龍鸞聲溢金
石志華日月如彼樹芳實穎實發望汨心歛瞻羅思越
藉用可塵昭忠難闕

祭弟文

闔棺窮野啓殯中荒靈影夙滅筵寢虛張人往運來自
秋徂陽蕃蘭落色宿草滋長孰云不痛辭家去鄉爾之
於役爰適茲邑上秋告來方春佇立如何不弔吉違凶
集六親懂心姻朋浩泣我雖載奔伊何云及永懷在昔
追亡悼存惟兄及弟瞻母望昆生無榮嫵沒望歸魂令
龜吉兆祖觀東旋靈輶次路嚴舟在川廓然何及痛矣
終天

銘

家傳銘

曠彼琅邪實唯海宇誰其來遷時聞遠祖青州隱秀爰
始奠居內辭鼎府外秉邦閭建節中平分竹黃初刑清
齊右政偃營區葛嶧明懿平陽聰理或薦公庭或登宰
士列美霸朝變風千里華萼之茂於昭不已

狀

天馬狀

降靈驪子九方是選白驥朱文綠蛇紫燕水軼驚鳧陸
越飛箭遇山為風值雲成電

樂府

宋南郊登歌三首

宋書樂志曰元嘉二十二年詔顏延之造
天地郊夕牲迎送神饗神雅樂登歌三篇

夕牲歌

寅威寶命嚴恭帝祖表海炳岱

選作炳
海表岱

系唐胄楚靈鑒

濟

選作
濟

文民屬睿武奄受敷錫宅中拓宇亘地稱皇聲

天作主月竈來賓日際奉土開元首正禮交樂舉六典
聯事九官列序有牲在滌有潔在俎以薦王衷以答神
祐

迎送神歌

維聖饗帝維孝饗親皇乎備矣有事上春禮行宗祀敬
達郊禋金枝中樹廣樂四陳陟配在京降德在民奔精
照夜高燎煬晨陰明浮爍沈滢音詠深淪告成大報受釐
元神月御按節星驅扶輪遙興遠駕曜曜振振

饗神歌

營泰時定天衷思心睿謀筮從建表蒔設郊宮田燭置
燿火通歷元旬律首吉飾紫壇坎列室中星兆六宗秩
乾宇晏地區謚大孝昭祭禮供牲日展盛自躬具陳器
備禮容形舞綴被歌鐘望帝閣聳神蹕靈之來辰光溢
潔粢酌娛太乙明燁夜華晷日裸既始獻又終煙籥鬯
報清穹饗宋德祚王功休命永福履充

從軍行

以下
五言

苦哉遠征人畢力幹時艱秦初畧揚越漢世爭陰山地
廣旁無界岳阿上虧天嶠霧下高鳥冰沙固流川秋颶
冬未至春液夏不涓閩烽指荆吳胡埃屬幽燕橫海咸
飛驪絕漠皆控弦馳檄發章表軍書交塞邊接鎬赴陣
首卷甲起行前羽驛馳無絕旌旗晝夜懸臥伺金柝響
起候亭燧煙逝矣遠征人惜哉私自憐

秋胡行

九章

倚梧傾高鳳寒谷待鳴律影響豈不懷自遠每相匹婉

彼幽閒女作嬪君子室峻節貫秋霜明艷伴朝日嘉運
既我從欣願自此畢

燕居未及好

五臣作散

良人顧有違脫巾千里外結綬登皇

畿戒徒在昧旦左右來相依驅車出郊郭行路正威遲
存為久離別沒為長不歸

嗟余怨行役三陟窮晨暮嚴駕越風寒解鞍犯霜露原
隰多悲涼迴飈卷高樹離獸起荒蹊驚鳥縱橫走悲哉
遊宦子勞此山川路

超搖行人遠宛轉年運徂良時

五臣作人

為此別日月方向

除孰知寒暑積僂俛見榮枯歲暮臨空房涼風起坐隅
寢興日已寒白露生庭蕪

勤役從歸願反路遵山河昔辭秋未素今也歲載華蠶

月歡

一作觀

時暇桑野多經過佳人從所務窈窕援高柯

傾城誰不顧弭節停中阿

年往誠思勞路遠濶音形雖為五載別相與昧平生捨
車遵往路鳬藻馳目成南金豈不重聊自意所輕義心

多苦調密比金玉聲

高節難久淹竭來空復辭遲遲前途盡依依造門基上

堂拜嘉慶入室問何之日暮行來

選作采

歸物色桑榆時

美人望昏至慚歎前相持

有懷誰能已聊用申苦難

補註作艱

離居殊年載一別阻河

關春來無時豫秋至恒早寒明發動愁心閨中起長歎

慘悽歲方晏日落遊子顏

高張生絕弦聲急由調起自昔枉光塵結言固終始如

何久為別百行儻

善作
愆

諸已君子失明義誰與偕沒齒

愧彼行露詩甘之長川汜

輓歌

令邇啓明兆撒奠在方昏戒徒赴幽冥祖駕出高門行
行去城邑遙遙守丘園息鑣竟平塚稅駕別巖根

詩

應詔讌曲水作詩

八章
以下四言

宋畧曰元嘉十一年三月楔飲于樂遊苑祖
道江夏王義恭衡陽王義季有詔會者賦詩

道隱未形治彰既亂帝迹懸衡皇流共貫惟王創物永
錫洪筭仁固開周義高登漢

祚融世哲業光烈聖太上正位天臨海鏡制以化裁樹
之形性惠浸萌生信及翔泳

崇虛非徵積實莫尚豈伊人和寔靈所貺日完其朔月
不掩望航琛越水輦賁踰嶂

帝體麗明儀辰作貳君彼東朝金昭玉粹德有潤身禮
不愆器柔中淵映芳猷蘭秘

昔在文昭今惟武穆於赫王宰方旦居叔有睟獻蕃爰
履奠牧寧極和鈞屏京維服

朏魄雙交月氣參變開榮灑澤舒虹爍電化際無間皇
情爰眷伊思鎬飲每惟洛宴

郊餞有壇君舉有禮幙帷蘭甸畫流高陸分庭薦樂析
波浮醴豫同夏諺事兼出濟

仰閱豐施降惟微物三妨儲隸五塵朝黻途泰命屯恩
克報屈有悔可悛滯瑕難拂

皇太子釋奠會作 九章

宋畧曰元嘉二十年三月
皇太子劭釋奠于國學

國尚師位家崇儒門稟道毓德講藝立言浚明爽曙達
義茲昏永瞻先覺顧惟後昆

大人長物繼天接聖時屯必亨運蒙則正偃閉武術闡
揚文令庶士傾風萬流仰鏡

虞庠飾館睿圖炳晬懷仁憬集抱智屬至踵門陳書躡
僑獻器澡身玄淵宅心道秘

伊昔周儲聿光往記思皇世哲體元作嗣資此夙知降

從經

一作繼

志過彼前文規周矩值

正殿虛筵司分簡日尚席函丈丞疑奉帙侍言稱辭惇
史秉筆妙識幾微王載有述

肆

五臣作肆

議芳訊大教克明敬躬祀典告奠聖靈禮屬觀

盟樂薦歌笙昭事是肅俎實非馨

獻終襲吉即宮廣讌堂設象筵庭宿金懸台保兼徽皇
戚比彥肴乾酒澄端服整弁

六官視命九賓相儀纓笏巾序巾卷克街都莊雲動野
馗風馳倫周伍漢超哉邈猗

清暉在天容光必照物任其情理宣其興妄先國胄側
聞邦教徒愧微冥終謝智效

三月三日詔宴西池詩

河嶽曜圖聖時利見於赫有皇升中納禪載貞其恒載
通其變大哉人文至矣天睠昭哉儲德靈慶攸繁明兩
紫宸景物乾元帝宗眷藹惟城惟蕃袞衣善職彤弓受

言飾館春宮稅鑣青輅長筵逶迤浮觴汧沂

為皇太子侍宴餞衡陽南平二王應詔詩

大儀在御皇聖居貞旁緝民紀仰緯天經物資感變神
以瑞形川無遁寶山不閔靈亦既戒裝皇心載遠夕帳
亭臯晨儀禁苑神行景鶩發自靈閭對宴感分瞻秋悼
晚

應詔觀北湖田收

周御窮轍迹夏載歷山川蓄軫豈明懋善遊皆聖仙帝

暉膺順動清蹕巡廣廡樓觀眺豐穎金駕映松山飛奔
互流綴緹縠代迴環神行埒浮景爭光溢中天開冬脊
徂物殘悴盈化先陽陸團精氣陰谷曳寒煙攢素旣森
藹積翠亦蔥芊息饗報嘉歲通急戒無年溫渥浹輿隸
和惠屬後筵觀風久有作陳詩愧未妍疲弱謝陵遽取
累非縈牽

車駕幸京口侍遊蒜山作

元嘉二十
六年也

元天高北列日觀臨東溟入河起陽峽踐華因削成巖

險去漢宇襟衛徒吳京流池自化造山關固神營園縣
極方望邑社總地靈宅道炳星緯誕曜應辰明睿思纏
故里巡駕帀舊垌陟峰騰輦路尋雲抗瑤覺春江壯風
濤蘭野茂萑英宣遊弘下濟窮遠凝聖情嶽濱有和會
祥習在卜征周南悲昔老留滯感遺氓空食疲廊肆反
稅事嚴耕

車駕幸京口三月三日侍遊曲阿後湖作

元嘉二十

六年也

虞風載帝狩夏諺頌王遊春方動宸駕望幸傾五州山
祇踣嶠路水若警滄流神御出瑤軫天儀降藻舟萬軸
脣行衛千翼汎飛浮雕雲麗璇蓋祥飈被綵旂江南進
荆豔河激獻趙謳金練照海浦笳鼓震溟洲藐盼靚青
崖衍漾觀綠疇民靈騫都野鱗翰聳淵丘德禮既普洽
川嶽徧懷柔

拜陵廟作

周德恭明祀漢道遵光靈哀敬隆祖廟崇樹加園塋逮

事休命始投迹階王庭陪廁迴天顧朝譙流聖情早服
身義重晚達生戒輕否來王澤竭泰往人悔形敕躬慚
積素復與昌運并恩合非漸漬榮會在逢迎夙御嚴清
制朝駕守禁城束紳入西寢伏軫出東垞衣冠終冥漠
陵邑轉蔥青松風遵路急山煙冒隴生皇心憑容物民
思被歌聲萬紀載絃吹千歲託旒旌未殊帝世遠已同
淪化萌幼壯困孤介末暮謝幽貞發軌喪夷易歸軫愼
崎傾

贈王太常

玉水記芳流璇源載圓折蓄寶每希聲雖秘猶彰徹玲
龍睪音切九淵聞鳳窺丹穴歷聽豈多士歸然覲時哲舒

文廣國華敷言遠朝列

五臣作烈

德輝灼邦懋芳風被鄉耆

側同幽人居郊扉常晝閉林間時晏開亟迴長者轍庭
昏見野陰山明望松雪靜惟決羣化徂生入窮節豫往
誠歡歇悲來非樂閑屬美謝繁翰遙懷具短札

夏夜呈從兄散騎車長沙

炎天方埃鬱暑晏闕塵紛獨靜闕偶坐臨堂對星分側
聽風薄木遙睇月開雲夜蟬當夏急陰蟲先秋聞歲候
初過半荃蕙豈久芬屏居惻物變慕類抱情殷九逝非
空思七襄無成丈

直東宮答鄭尚書

皇居體環極設險祇天工兩闡阻通軌對禁限清風跂
予旅東館徒歌屬南墉寢興鬱無已起觀辰漢中流雲
謁青闕皓月鑒丹宮踟躕清防密徙倚恒漏窮君子吐

芳訊感物惻余衷惜無丘園秀景行彼高松知言有誠
貴美價難克克何以銘嘉貺言樹絲與桐

和謝監靈運

弱植慕端操窘步懼先迷寡立非擇方刻意藉窮棲伊
昔遺多幸秉筆待兩閨雖慙丹腹施未謂玄素睽徒遭
良時設王道奄昏霾人神幽明絕朋好雲雨乖弔屈汀
洲浦謁帝蒼山蹊倚巖聽緒風攀林結留夷跂予間衡
嶠曷月瞻秦稽皇聖昭天德豐澤振沈泥惜無雀雉化

何用克海淮去國還故里幽門樹蓬藜采茨葺昔宇翦
棘開舊畦物謝時既宴年往志不偕親仁敷情昵興玩
賦善作 究辭悽芬馥歇蘭若清越奪琳珪盡言非報章聊
用布所懷

北使洛

改服飭徒旅首路跼險艱振楫發吳洲秣馬陵楚山塗
出梁宋郊道由周鄭間前登陽城路日夕望山川在昔
輟期運經始潤聖賢伊瀝絕津濟臺館無尺椽宮陛多

巢穴城闕生雲煙王猷升八表嗟行方暮年陰風振涼
野飛雲翳窮天臨塗未及引置酒慘無言隱憫徒御悲
威遲良馬煩遊役去芳時歸來屢徂讐蓬心既已矣飛
薄殊亦然

還至梁城作

眇然軌路長憔悴征戍勤昔邁先徂師今來後歸軍振
策睠東路傾側不及羣息徒顧將夕極望梁陳分故國
多喬木空城凝寒雲丘隴填郭郭銘誌滅無文木石局

幽閨黍苗延高墳惟彼雍門子吁嗟孟嘗君愚賤同堙
滅尊貴誰獨聞曷為久游客憂念坐自殷

始安郡還都與張湘州登巴陵城樓作

江漢分楚望衡巫奠南服三湘淪洞庭七澤藹荆牧經
途延舊軌登闈訪川陸水國周地險河山信重複却倚

雲夢林前瞻京

一作荆

臺囿清霄霽岳陽曾暉薄瀾澳悽

矣自遠風傷哉千里目萬古陳往還百代勞起伏存沒
竟何人炯介在明淑請從世上人歸來藝桑竹

五君詠五首

阮步兵

阮公雖淪跡，識密鑒亦洞。
沈醉似埋照，寓辭類託諷。
長嘯若懷人，越禮自驚衆。
物故不可論，途窮能無慟。

嵇中散

中散不偶世，本自餐霞人。
形解驗默仙，吐論知凝神。
立俗迕流議，尋山洽隱淪。
驚駟有時鍛，龍性誰能馴。

劉參軍

劉伶善閉關懷情滅聞見鼓鐘不足歡榮色豈能眩
精日沈飲誰知非荒宴頌酒雖短章深衷自此見

阮始平

仲容青雲器實稟生民秀達音何用深識微在金奏郭
奕已心醉山公非虛覲屢薦不入官一麾乃出守

向常侍

向秀甘淡薄深心託毫素探道好淵玄觀書鄙章句交
呂既鴻軒攀嵇亦鳳舉流連河裏遊惻愴山陽賦

為織女贈牽牛

婺女儷經星姮娥棲飛月慚無二媛靈託身侍天闕閭
闔殊未暉咸池豈沐髮漢陰不夕張長河為誰越雖有
促譙期方須涼風發虛計雙曜周空遲三星沒非怨杼
軸勞但念芳菲歇

歸鴻

昧旦濡和風霑露踐朝暉萬有皆同春鴻鴈獨辭歸相
鳴去澗汜長引發江濺皦潔登雲侶連綿千里飛長懷

河朔路緬與湘漢違

除弟服

徂沒離二秋掩泣備三冬
往辰緬難紀來筭忽易窮
升沒淹晷晦灑掃易禮容
縞衣變余體長逝歸爾躬

辭難潮溝

徘徊眷郊甸俛仰引單襟
一塗苟不豫百慮畢來侵
永懷交在昔有願誓瑟琴
寫言勞者事將用慰亡簪


侍東耕詩

提封經地域辰角麗天部浮靄起青壇沈腴發紺藕草
服薦同穗黃冠獻嘉壽闕

登景陽樓

詩彙作
袁淑非

風觀要春景月榭迎秋光
汭波被華若隨山茂貞芳



漢魏六朝百三家集卷六十七